

Sportament. Lengac, sport e identità

Te la Giornèda Internazionèla del Lengaz de la Mère, ai 21 de firé, aló da la Sorastanza de la Scoles de Fascia, vegn metù a jir n convegno su sport e lengaz

Sport e identità - Anter i 6000 lengac rejoné tel mond n'è de chi dic de maoranza e de chi manco slarié fora, dic de mendranza, che i fèsc pèrt de l'identità de pìcoi gropes de persones, con chi che i palesa sia cultura e sie patrimonie sozièl. Te dut l mond l'è mendranzes linguistiches, l'è assà pissèr ai Catalegn, ai Ozitegn, ai Frisons, ai Baschi e ai Gallesi. Te la Tèlia l'è adertura 12 lengac mendres recognosciui, anter chisc l ladin, l mochen, l cimber, l furlan, l sardo, l'albaneis, l grech e amò de etres.

Con chela de stravardèr chest gran patrimonie linguistich e culturèl l'Unesco à declarà i 21 de firé de vigni an "Giornèda Internazionèla del Lengaz de la Mère", a testamonech de la sensibilità envers l pluralism e la desvalivanza culturèla. Chest an

tel Trentin per zelebrèr la Giornèda l'è stat cernù l sport per sia forza comunicativa, per la dimenjion associaziva, per l'aspet educatif e per la valuta sozièla. Sport e lengaz ensema doventa testamonesc de la richeza no materièla de na sozietà che te la desvalivanza e te la pluralità fèsc sù sie davegnir. Te Fascia aló da la Sorastanza de la Scoles de Fascia, con la colaborazion del Comun General de Fascia, vegn metù a jir n convegno apontin sun chest argument.

Al convegno sarà prejent anter i etres Franco Soldati, president de la Udinese Balon, la soula squadra talièna de balon che porta dant sun sie sit na piata tel lengaz de mendranza, descheche fèsc ence l Barcelona Balon. Sarà amò Marta Stocker, Ines Cavalcanti de Chambrà d'Oc e Anastasia Cigolla.